

**Naligiissitaanissamut Siunnersuisoqatigiit pillugit Inatsisartut inatsisissaattut siunnersuut nr. \_\_\_\_\_ -imeersoq**

**Kapitali 1.**

*Naligiissitaanissamut Siunnersuisoqatigiit pilersinneqarnerat.*

§ 1. Naalackersuisut Naligiissitaanissamut Siunnersuisoqatigiinnik pilersitsissapput.

**Kapitali 2.**

*Naligiissitaanissamut Siunnersuisoqatigiit suliassaat.*

§ 2. Naligiissitaanissamut Siunnersuisoqatigiit inuiaqatigiinni kalaallini angutit arnallu na- ligiissitaanerata siuarsarneqarnissaa sulissutigisassaraat.

Naligiissitaanissamut Siunnersuisoqatigiit namminneerlutik, imaluunniit qinnuigineqarlutik, pissutsit naligiissitaanissamut tunngasut misissorsinnaavaat.

*Imm. 2.* Naligiissitaanissamut Siunnersuisoqatigiit aammattaaq:

- 1) inuiaqatigiit ineriartornerat malinnaaffigissavaat,
- 2) Namminersornerullutik Oqartussanut, kommuninut namminersortunullu naligiissitaanermut tunngasutigut siunnersuisassapput,
- 3) Nunani Avannarlerni naligiissitaanissamut siunnersuisoqatigiinnut siunnersuisuusunut attaveqaataassapput aamma
- 4) naligiissitaaneq pillugu innuttaasunut oqartussaasunullu paasisitsiniaaqqusillunilu paasisitsiniaanermi suleqataassapput.

*Imm. 3.* Naligiissitaanissamut Siunnersuisoqatigiit ukiut tamaasa ukiumi qaangiuttumi sulineq pillugu Naalackersuisunut nalunaarusiortassapput.

**Kapitali 3.**

*Naligiissitaanissamut Siunnersuisoqatigiit aaqqissuussaanagerat.*

§ 3. Naligiissitaanissamut Siunnersuisoqatigiit ilaasortarai siulittaasoq ilaasortallu arfineq-pingasut. Naalackersuisut siulittaasussamik ilaasortallu sinnerinik arfineq-pingasunik Naligiissitaanissamut Siunnersuisoqatigiit pilersinneqarfiat aallarnerfigalugu ukiuni sisamani ilaasortaasussamik toqqaassapput. Ilaasortat arfineq-pingasut taakku suliniaqatigiiffiit partiillu imm. 2-4-mi taaneqartut inassuteqarnerisigut toqqarneqassapput.

*Imm. 2.* Suliniaqatigiiffiit uku tamarmik ilaasortassamik sapinngisamik

ajornanngippat angummik arnamillu inassuteqassapput:

- 1) Kommunit Kattuffiat,
- 2) Saaffiginnittarfiit Qimarnguiillu Kattuffiat aamma
- 3) Kalaallit Nunaanni Sulisitsisut Peqatigiiffiat.

*Imm. 3.* Partiit pingasut Inatsisartuni sinniisuutitaqarnerpaat tamarmik immikkut ilaasortaatitassaminnik sapinngisamik angummik arnamillu inassuteqassapput.

*Imm. 4.* Suliniaqatigiiffiit uku nikittaallutik sapinngisamik ajornanngippat angummik arnamillu inassuteqartassapput:

- 1) Arnat Peqatigiit Kattuffiat aamma Aalisartut Piniartullu Nuliaasa Aappaasalu Peqatigiiffiisa Kattuffiat,
- 2) Sulinermik Inuussutissarsiuteqartut Kattuffiat aamma Nunatsinni Atorfillit Kattuffissuat.

*Imm. 5.* Naligiissitaanissamut Siunnersuisoqatigiit ukiuini sisamani siullerni Arnat Peqatigiiffiisa Kattuffiat aamma Sulinermik Inuussutissarsiuteqartut Kattuffiat ilaasortassaminnik inassuteqassapput.

**§ 4.** Suliniaqatigiiffiit § 3 imm. 2-mi aamma 4-mi taaneqartut sapinngisamik angummik arnamillu inassuteqarsinnaapput Naligiissitaanissamut Siunnersuisoqatigiinni ilaasortaatitartik:

- 1) suliniaqatigiiffimmu ilaasortaajunnaarpat, imaluunniit
- 2) suliainik ingerlatsisinnaajunnaarpat.

*Imm. 2.* Partiit § 3 imm. 3-mi taaneqartut Naligiissitaanissamut Siunnersuisoqatigiinni ilaasortaatitartik suliainik ingerlatsisinnaajunnaarpat sapinngisamik angummik arnamillu inassuteqarsinnaapput.

**§ 5.** Naligiissitaanissamut Siunnersuisoqatigiit suleriaasissartik namminneq aalajangersassavaat.

*Naligiissitaanissamut Siunnersuisoqatigiit allattoqarfiat.*

**§ 6.** Naligiissitaanissamut Siunnersuisoqatigiit ulluinnarni suliassat ingerlanneqarfissaannik namminneq allattoqarfissaminnik pilersitsissapput.

*Imm. 2.* Naligiissitaanissamut Siunnersuisoqatigiit allattoqarfimmi sulisunik atorfinitsitsinissamut soraarsitsinissamullu oqartussaaffeqarput. Allattoqarfimmi sulisunik atorfinitsitsinermi soraarsitsinermilu il.il. atugassarititaasut eqqarsaatigalugit Namminersornerullutik Oqartussani sulisut pillugit aalajangersakkat sukkulluunniit atuuttut malissallugit Naligiissitaanissamut Siunnersuisoqatigiit pisussaataapput.

#### **Kapitali 4.**

*Aningaasalersorneqarnera.*

**§ 7.** Naligiissitaanissamut Siunnersuisoqatigiit landskarsimit tapiissutigut aningaasalersorneqarput.

*Imm. 2.* Tamatuma saniatigut Naligiissitaanissamut Siunnersuisoqatigiit

suliniaqatigiiffinit namminersortunit pisortanilluunniit oqartussaasunit suliaminnut atugassaminnik aningaasassarsiorsinnaapput.

*Imm.* 3. Naligiissitaanissamut Siunnersuisoqatigiit siunertamik iluanni, tak. § 2, isertitaaqarfiusartunik ingerlataqarsinnaapput.

**§ 8.** Naligiissitaanissamut Siunnersuisoqatigiit ilaasortaat Inatsisartunut, Naalackersuisunut il.il. ilaasortat akissarsiaqartinneqarnerat pillugu Inatsisartut inatsisaanni malittarisassat malillugit akissarsiaqartinneqassapput, ullormusiaqartinneqassallutik, angalanerminnilu a-ningaasartuutaat akilerneqartassallutik. Aningaasartuutit taakku landskarsimit ukiumut tapiissutit iluannit aningaasartuutigineqassapput.

#### *Missingersuutit naatsorsuutillu*

**§ 9.** Naligiissitaanissamut Siunnersuisoqatigiit ukiut tamaasa Naalackersuisunut ukiumi tullermi aningaanut inatsiseqarfiusumi missingersuutissatut siunnersuutininik saqqummiussaqartassapput. Siunnersuut isertitarissangasat aningaasartuutigissangasallu missingerneqarnerinik imaqartassaaq. Tamatumunnga peqatigitillugu Naligiissitaanissamut Siunnersuisoqatigiit u-kiumi aningaasanut inatsiseqarfiusumi taaneqartumi landskarsimit tapiissutit amerlassusissaat pillugu siunnersuuteqassapput.

*Imm.* 2 Naalackersuisut ukiumut aningaasanut inatsiseqarfiusumut tullermut missingersuutinut landskarsimillu tapiissutit amerlassusissaanut siunnersuutit tunniunneqarfissaannik killissaliissapput.

**§ 10.** Naligiissitaanissamut Siunnersuisoqatigiit naatsorsuutaasa ukioq aningaasanut inatsisesaqarfiusoq malissavaat. Ukiumut naatsorsuutit kukkunerisuisumit kukkunerisuisutut sulinissaminut akuerineqarsimasumit kukkunerisiorneqartassapput.

**§ 11.** Naligiissitaanissamut Siunnersuisoqatigiit Naalackersuisut piffissaliussaata iluani ukiumut naatsorsuutit kukkunerisuiukat kukkunerisuisup oqaaseqaataanik ilallugit Naalackersuisunut akuerisassanngorlugit saqqummiutissavaat.

### **Kapitali 5.**

#### *Atortuulerfia.*

**§ 12.** Inatsit manna ulloq 1. juli 1998 atortuulerpoq.

*Imm.* 2. Tamatumunnga peqatigitillugu Kalaallit Nunaanni Arnat Angutillu Naligiissitaalernissaat Pillugu Ataatsimiititaliaqalernissaanik Inatsisartut inatsisaat nr. 17, 8. november 1985-imeersoq atorunnaarsinneqarpoq.

Jonathan Motzfeldt

/

Mikael Petersen